

## 'Bayar PTPTN, dapat hadiah istimewa'

**Kuala Lumpur:** Rakyat Malaysia secara umumnya bersetuju bayaran balik pinjaman Perbadanan Tabung Pendidikan Tinggi Nasional (PTPTN) adalah tanggungjawab, akauntabiliti dan keadilan yang perlu dipenuhi peminjamnya.

Timbalan Menteri Pendidikan Tinggi Datuk Mohammad Yusof Apdal berkata, maklum balas itu diperolehi hasil penganjuran Hari Terbuka Pendidikan Tinggi yang berlangsung pada 23 Oktober lalu.

"Malangnya kita berdepan keadaan ramai tidak bertanggungjawab, menyebabkan tiada keadilan. Maknanya dia dah pinjam dahulu untuk belajar, bila dia dah berjaya dan bekerja, dia tak bayar.

"Jadi ini menimbulkan masalah bukan sahaja kepada PTPTN yang menanggung hutang besar malah lebih dahsyat, dia mengganggu peluang orang lain yang nak meneruskan pelajaran," katanya, semalam.

Justeru, beliau menggalakkan orang ramai hadir ke Program Setahun Bersama Kerajaan Madani di



SEBAHAGIAN pengunjung yang hadir ketika Program Setahun Bersama Kerajaan Madani di pekarangan Stadium Nasional Bukit Jalil. - Gambar NSTP/HAIRUL ANUAR RAHIM

pekarangan Stadium Nasional Bukit Jalil sehingga esok bagi mendapatkan khidmat konsultasi menguruskan pembayaran selain menikmati diskaun bayaran balik sehingga 15 peratus.

"Kerajaan meluluskan diskaun ini bermula 14 Oktober 2023 hingga 31 Mac 2024 namun masih ramai tidak mengambil peluang. Bagi pengunjung yang membuat bayaran semasa program berlangsung, ada hadiah istimewa diberikan

selain diskaun.

"Selain diskaun PTPTN, urusan pembukaan akaun serta penambahan deposit simpanan SSPN disediakan," katanya.

Mengenai tawaran secara terus bagi kemasukan ke universiti awam, politeknik dan kolej komuniti terpilih, Yusof berkata, bagi calon lepasan Sijil Pelajaran Malaysia (SPM) yang belum mendapat tempat pengajian boleh hadir ke reruai Kementerian Pendidikan Tinggi (KPT).

"Sila bawa kad pengenalan dan salinan SPM bagi kemasukan ke Program Sepenuh Masa Sesi II 2023/2024. Bagi calon tiada SPM dan berminat sambung belajar dialu-alukan hadir sebab di sana kita ada program di bawah Kolej Komuniti yang dinamakan Pembelajaran Sepanjang Hayat, ini beri peluang kepada mereka yang tiada kelulusan minimum mendapatkan peluang kedua di bawah program Kolej Komuniti," katanya.